

四庫全書

史部

# 欽定四庫全書

史部

王端毅奏議卷八至十一

詳校官侍講學士臣法式善

編修臣 裴謙覆勘

總校官進士臣繆 琪

校對官中書臣葉 蓂

謄錄監生臣任 鑑

欽定四庫全書

王端毅奏議卷八

明 王恕 撰

吏部

議左都御史馬文升陳言裨益治道奏狀

文選清吏司案呈奉本部送准禮部咨儀制清吏司案  
呈奉本部送禮科抄出都察院左都御史馬文升奏云  
云等因奏奉聖旨這本所言多切時弊該衙門便看了  
來說欽此欽遵移咨送司案呈到部看得都察院左都

御史馬文升所奏選賢能以任風憲等四事誠如聖諭  
謹用議擬開立前件伏乞聖裁緣係節奉欽依該衙門  
便看了來說事理未敢擅便弘治元年二月初七日具  
題初九日奉聖旨准議欽此 一查得舊例御史員缺

於各衙門辦事半年以上進士及本部聽選舉人監生  
并行人博士推官知縣教官內選補至成化六年以後  
拘於正統年間頒降憲綱新進初仕不預選任近該南  
京禮部精膳清吏司郎中李諒陳言本部議擬今後選

用御史於在京各衙門辦事進士與夫曾經一考稱職  
行人博士及進士舉人出身推官知縣內選年三十以  
上五十以下人物端莊言語正當操行廉潔才識優長  
者送都察院理刑半年滿日聽本院考察各註考語連  
人送部諳曉刑名堪任御史者奏請照缺選補但知縣  
推官係在外官員訪察未詳合無通行各處巡撫都御  
史巡按御史各於按屬進士舉人出身知縣推官內從  
公推舉如前相應之人備開脚色政蹟具奏以憑遇缺

行取相兼進士行人博士選送理刑不許舉非其人已經題准欽遵外今左都御史馬文升又奏前因誠為選用風憲之良法但恐遇有御史缺多六年以上知縣二年以上進士內相應之人數少必待其有然後選用不無誤事合無通行各處巡撫都御史巡按御史并布按二司官各於所屬曾經一考稱職進士舉人出身推官知縣內推舉年三十以上五十以下人物端莊言語正當操行廉潔才識優長者備開脚色政蹟具奏籍記在

部遇有御史員缺先儘六年以上行取前來相兼二年  
以上進士并一考行人博士選送理刑半年滿日聽本  
院考察各註考語連人送部以憑奏請選用如無相應  
六年以上知縣推官二年以上進士仍依本部議擬奏  
准事例於半年以上進士曾經一考稱職推官知縣內  
選用如此則選用亦可以得人風憲不至於久缺一  
查得舊例按察司官有缺於法司屬官內推補其知府  
同知推官知州知縣有原係法司出身及曾在法司辦

事者亦得推補如蘇州府知府林鶚推補江西按察使  
寶坻縣知縣葉淇推補廣西僉事是已至於斷事理問  
推官有缺本部臨時斟酌選用而法司辨事進士歷事  
舉人監生居多但進士及舉人監生俱是挨次取選而  
舉人監生又係臨選考校或前或後人缺有不相當難  
以一一照缺對人除補今左都御史馬文升奏稱前因  
合無今後按察司官有缺先儘法司相應屬官推補其  
知府同知等官果有諳練刑名政聲卓異者亦得量才



推舉斷事理問推官有缺先儘法司辦事進士歷事舉人監生除補次及相應人員所言不許差占斷事理問推官有誤問刑一節係是見行事例但各該官司奉行未至或遇緊急公務往往差遣委的有誤問刑合無行都察院轉行各處巡撫巡按及布按二司今後不分大小公務俱不許違例差遣斷事理問推官妨誤問刑如此則司刑得人刑不枉濫矣 一查得舊例知州知縣缺少本部於常選內將該選進士監生及該陞官員除

補如遇缺多照依大學士李賢奏准事例將聽選監生舉人不分年月遠近揀選考補近該成化二十三年朝覲考察黜退天下知州知縣數多本年四月內於常選外將聽選舉人監生照例揀選考試除補知州知縣共一百九十五員給憑赴任去訖餘有員缺常選陸續除補但州縣數多隨補隨缺未能得完而人民繁夥錢糧浩大去處知州知縣實難其人本部已經題准將成化二十三年第三甲進士取選兼同舉人監生及該陞官

員通行除補外候員缺數多仍照前例揀選除補所言  
四川雲南廣西福建路途險遠若待缺到除官不無太  
遲要行先期除官頂補固為有理若不查勘應否一槩  
扣缺除補恐前官中間亦有事故一年之上未滿後官  
將帶家小守候日久不得支俸管事衣食不足求其不  
為奸民猾吏所餌斯亦難矣合無通行各該巡撫巡按  
官將所屬州縣正官二考之上九年將滿者按季查奏  
開具各官歷俸及該滿年月以憑斟酌遠近除補及將

新除官員訪察敢有過家留連不即到任者查照成化六年三月內本部奏准選授外任官員過遠憑限半年之上不到任者雖有中途患帖不准照例問罪過一年之上者不許到任起送革職為民事例施行若在中途及任所事故去任者所在官司并原任衙門即時具由通行合干上司及徑申本部知會以憑作缺銓補其言布政使按察使知府所係甚大尤宜慎選一節本部遇有前項正官員缺未嘗不廣詢博訪慎擇其人二司正

官每員推舉二員請旨簡命一員知府亦精擇一員請  
旨陞用自今以後益當盡心推選以求無負委任如此  
則正官亦可得人庶務不至廢墜矣 一查得舊例兩  
京各衙門屬官三年六年九年考滿先從本衙門堂上  
官考覈送都察院覆考又送本部覆考從而黜陟以示  
勸懲近年各司因循苟且所出考語不辯淑慝虛應故  
事及至覆考得實其平常官員輒便造謗撫拾以致考  
覈不行無所勸懲誠如左都御史馬文升所言合無通

行兩京各衙門知會今後屬官考滿堂上官務秉至公  
詢訪得實出與考語善善惡惡定為確論送都察院并  
本部覆考如原來考語平稱得當續出考語不嫌雷同  
若有不當聽覆考官從公考覈其被考平常之人敢有  
仍前造謗撫拾許御史等官指實劾奏拏問平常者降  
調外任有賊者罷黜為民若覆考挾私不公一體治罪  
其有前考平常後考中間能深自懲艾勉於為善者亦  
宜書稱前考稱職後考中間放肆改節者亦書平常以

憑黜陟如此則勸懲無私而官僚知儆矣

嚴考察以勵庶官奏狀

考功清吏司案呈奉本部送吏科抄出南京河南道監察御史吳泰等奏云云等因具本奏奉聖旨這考察事吏部看了來說欽此欽遵抄出到部送司查得成化四年該科道官魏元等奏要考察兩京大小衙門官員本部奏奉憲宗皇帝聖旨是有堂上官的還會堂上掌印官公同考察欽此已經會官考察外成化十三年又該

御史戴縉奏要考察兩京五品以下官員本部查照前  
例具題節奉憲宗皇帝聖旨還照例會官考察欽此欽  
遵又經會官考察訖案呈到部看得南京河南等道監  
察御史吳泰等奏稱兩京堂上官并在外司府州縣官  
已經考察獨兩京各衙門五品以下官員年久未經考  
察其間才行可稱者固多而貪冒苟容者亦有要行兩  
京吏部會同兩京都察院公同各衙門堂上掌印官從  
公逐一考察一節臣等竊惟兩京堂上官并在外司府



州縣官節經糾劾考察黜退惟兩京五品以下官委的年久未經考察不無賢否混淆誠如吳泰等所言合無准其所奏照依前例在京者本部會同都察院并公同各衙門堂上掌印官將五品以下現任帶俸并丁憂公差養病省祭等項官員從公逐一考察除廉幹公勤才行超卓者遇有內外相應員缺另行具奏擢用職業頗修操履不失者存留辦事外其貪淫酷暴罷軟老疾素行不謹浮躁淺露者開具職名奏請定奪如考察不公

仍聽科道糾舉其被黜之人若有造言生事撫拾妄奏者治以重罪發遣為民仍行移南京吏部會同南京都察院等衙門一體考察徑自具奏定奪其言要嚴立歲考之法在京諸司堂上掌印官及在外布按兩司并各府掌印官每遇年終各將本衙門及僚屬官員廉貪能否勤惰得失緣由斟酌的確考語造冊三本一本奏繳一本送吏部一本送都察院查照一節仰惟國朝定制內外官員已有三載考績三考黜陟之典外官又有朝

觀考察之例若再更立歲考之法不無事體紛更難准  
所擬合無仍照舊例通行在京在外前項衙門堂上掌  
印官如遇所屬官員三年六年九年考滿之日務要從  
公嚴加考覈所出考語亦要允協公論不許徇情虛應  
故事以致賢否混淆黜陟不當事發連坐以罪緣係考  
察官員及奉欽依這考察事吏部看了來說事理未敢  
擅便弘治元年二月十九日具題當日奉聖旨是欽此

論釋奠禮奏狀

近該禮部儀制清吏司手本內開皇上於今年三月三日幸太學釋奠先師孔子以臣為分獻東哲官榮幸莫大焉竊觀儀注內一段開稱導引官導上詣大成殿陞上典儀唱執事官各司其事執事官各先斟酒於爵候導上至拜位贊就位百官亦各就拜位四配十哲分獻官各詣殿陞東西階下兩廡分獻官各詣廡前俱北向立贊迎神樂作樂止贊上鞠躬拜興拜興平身通贊百官行禮同贊稽圭上稽圭執事官跪進爵樂作上受爵

獻畢復授執事官奠於神位前樂止贊出圭上出圭四配十哲兩廡分獻官以次詣神位前奠爵訖仍以次出殿門外東西向立典儀唱送神樂作樂止贊上鞠躬拜興拜興平身通贊陪祀官行禮同導引官導上由中道出分獻官以次退若依此儀注則分獻官始終不拜矣皇上拜陪祀官俱拜獨分獻官始終不拜恐非禮也臣愚以為分獻官拜位當在殿陛之下列於陪祀官之前贊迎神上在殿陛上拜分獻官陪祀官俱在殿陛下拜

上獻爵畢分獻官以次詣神位前奠爵訖復退於殿陛  
下原拜位立定贊送神上拜分獻官陪祀官俱拜似為  
近禮臣讀禮記文王世子篇有曰凡學春官釋奠於其  
先師秋冬亦如之此言春官之釋奠主於行禮非報功  
也故無幣又曰凡始立學者必釋奠於先聖先師及行  
事必以幣此言立學事重故釋奠必以幣今皇上嗣登  
大寶初幸太學即所謂始立學也臣愚以為釋奠當用  
幣爵亦當三獻今儀注內無獻幣之禮是行春官釋奠

之禮非始立學釋奠之禮也似為未安或以為舊儀注如此臣以為舊儀注是則當從之或有差誤亦當更之以求合乎宜似不可以訛承訛也如蒙乞下臣言於禮官會同翰林院官議之然後行事則聖明幸學釋奠之禮庶幾合乎宜而可以傳之於後矣臣向奉聖旨事有當言的盡心來說欽此臣偶有所見不敢不言之當與不當有不遑計也具本弘治元年二月二十五日奏奉聖旨禮部看了來說欽此次日禮部覆奏奉聖旨分

獻官拜禮准行其餘只照舊欽此

論吏典丁憂奏狀

稽勲清吏司案呈該刑部陝西清吏司辦事吏姚仲良  
成化二十一年八月二十三日間母李氏在家病故告  
要依例守制該司恐有詐冒拘留不放類行本吏原籍  
河南查勘來報本吏又行具奏奉憲宗皇帝聖旨吏部  
知道欽此欽遵抄出送司為無辦事衙門公文送到連  
人送去該司查理該司又行查催未報間本吏辦事已



滿告撥外考去訖今河南布政司方纔勘報前來案呈  
到部查得諸司職掌內凡內外官吏人等例合丁憂者  
仍以聞喪月日為始不計閏二十七箇月服滿起復今  
辦事吏姚仲良成化二十一年八月二十三日聞喪具  
告刑部該司要回原籍守制該司恐有詐冒類行原籍  
查勘至今三十箇月有餘纔方回報以聞喪日為始扣  
至成化二十三年十一月二十三日已該服滿查得本  
吏於弘治元年正月二十一日願撥外考去訖若不令

本吏守制則恐自此廢守制之典是使人以不孝也合  
無自文書到彼日為始就令見役官司給與文引照回  
原籍依例守制滿日起復仍通行在京各衙門知會今  
後遇本部該司行查丁憂吏典查無粘帶等項違碍即  
便送部照例放回本部徑自類行查勘定奪不許似前  
拘留行查以致遷延歲月不得依例守制非惟不近人  
情抑且有傷風化緣係吏役守制事理未敢擅便弘治  
元年二月二十四日具題次日奉聖旨是欽此

再論釋奠禮奏狀

昨見禮部行來皇上幸太學儀注內開釋奠先師孔子迎神皇上兩拜陪祀官亦兩拜分獻官却各詣大成殿陞東西階下向北立不拜送神皇上兩拜陪祀官亦兩拜分獻官却出殿門外東西向立亦不拜臣以為皇上拜陪祀官亦拜獨分獻官不拜恐非禮也臣又見禮記有曰凡始立學者必釋奠於先聖先師及行事必以幣註云行事謂行釋奠之事必以幣必奠幣為禮也言始

立學而行釋奠之禮則用幣四時常奠不用幣也今釋奠儀注止開獻一爵而不奠幣故臣以為釋奠當奠幣爵亦當三獻乞下禮官會議該禮部議奏奉聖旨分獻官拜禮准行其餘只照舊欽此且臣言用幣者是據禮經而言非無稽之言也或以為天子視學不為祀先師孔子只可行釋奠禮不必用幣爵亦不必三獻臣又以為我朝列聖即位各止耕藉田一次幸太學一次若於禮文少有未備後欲更定而行之不可復得雖悔無及

臣欲再為陛下言之因見日期促近已有成命不敢復言心實不安今既阻雨另行擇日行事臣若不言是為自欺非忠也夫釋奠之禮既用牲用樂而獨不用幣既行分獻禮而於先師孔子前止獻一爵豈非缺典又且差官取孔顏孟三氏子孫前來使之觀禮賜紵絲衣每人一套又賜宴又賜國子監祭酒司業紵絲衣羅衣各一套學官三十餘員每人紵絲衣一套又賜在廷大臣宴於奉天門所費頗多何獨於先師孔子而吝幣哉若

謂此舉只為幸學不為祀先師孔子且如耕藉田亦只是為耕藉田非為祀先農也如何祀先農奠幣行三獻禮而獨於幸太學釋奠之禮不然況祀先農行各衙門官齋戒太常寺光祿寺又奏省牲而釋奠之禮既不齋戒又不奏省牲何其詳畧之不一如此豈未之思乎臣竊惟皇上即位勸農勸學之禮止行一次而不至再至三者惟耕藉田幸太學二事而已其禮皆當從厚不可有所偏重以貽日後之悔昔太宗皇帝將幸太學命禮

部詳議禮儀尚書鄭賜言宋制謁孔子服靴袍再拜太宗皇帝曰見先師禮不可簡必服皮弁行四拜禮其事載諸五倫書人以為太宗皇帝尊師重道之意超越宋之諸君遠矣今陛下釋奠先師禮比祀先農之禮而行之似不為過異日載諸史冊傳之千萬世豈不為盛美之事哉如蒙乞勅禮部集議明白奏請定奪而行之以成萬世不刊之典不勝幸甚若臣言妄誕甘受顯戮煩言如此塵瀆聖聽豈勝惶怖之至弘治元年三月初三

日具題次日奉聖旨這本禮部便會詹事府國子監翰林院春坊官詳議來說欽此該禮部等衙門官會議具題奉聖旨是尊先師當以禮既成化初年有所舉只孔子前加幣用太牢改分獻為分奠其餘儀物俱照永樂年例行欽此

議知府王衡陳言停止納財充吏奏狀

驗封清吏司案呈奉本部送吏科抄出直隸廣平府知府王衡等奏云云等因具本該通政使司官於奉天門



奏奉聖旨吏部知道欽此欽遵抄出到部送司查得成化三年十月內該浙江嘉興府知府楊繼宗奏稱納米農民俱係奔競無藉之徒營求請託借債納米若得參充瞞官作弊要乞革去照依洪武年間舊例著落里老呈報相應識字農民叅補等情本部已經依擬題准通行天下遵守去後又查得成化二十一等年該陝西山西宣府江西等處巡撫右副都御史等官鄭時等各因地方灾傷賑濟軍馬糧草缺乏節次奏准定與則例生

員上納銀米入監讀書在京在外吏典承差知印上納銀米草束或免辦事考試就撥當該或免當該考試就與冠帶各照資格出身或聽選不拘年分不次選用除生員事例停止外其餘俱各見行及查得自成化二十一年起至弘治元年二月終止吏典人等納過糧草等項已到部者共二千一百五十餘名生員納過銀米已入監者共六千餘名通查案呈到部訪得永樂宣德正統年間天下亦有災傷各邊亦有軍馬當時未嘗舉行

納糧草納銀兩為監生為吏典等項事例糧草不聞不足兵民不聞困斃近年以來各邊并腹裏小有灾傷所在守土等官止圖目前分寸之利不為國家長久之謀輒便奏開生員吏典人等納糧草銀兩等項事例彼此效尤遂為長策殊不知祖宗教養生員叅充吏役良法美意各有攸在且如生員選於民間俊秀子弟教養於學校成材者科貢入監不成材者充吏為民未嘗不別賢否一槩濫進也其吏役亦必於農民之中選其識字

能書者充之令其書辦文案及其兩考後滿赴部辦事  
數年纔撥京考京考滿日考中纔得冠帶不中者發回  
為民亦未嘗不論能否一槩入選也近來因有前例是  
以在學無志生員及未入學富家子弟捏作生員名色  
不分賢否有無學識一槩入監以圖出身將來入仕不  
知為政之道豈不誤事殃民一切小民不分能書與不  
能書不論市民與農民一槩聽缺充吏不惟官司不得  
伊書辦文案且於舊制有違及其三考後滿又免考驗

一槩照依資格出身所以多不稱職比先年間監生止由科貢吏典亦循年資別無雜進之途是以聽選之人不多選法不致壅滯任用亦多得人自有此例雜進者日多一日以致正途監生吏典因而壅滯不得出身多者十七八年少亦不下十五六年纔得選用年已向衰誰肯盡心幹事不謀歸計甚至聽選年老例不入選只與冠帶閒住又況此等雜途所進中間多負債破產頑鈍無耻之輩今日既知以財進身他日豈肯以廉律已

欲不貪財害民天下治安何由可得若不早為處置日復一日不但有壞選法而正途有壅滯之苦抑恐官授非人而小民遭無窮之殃誠不可不慮也今廣平府知府等官王衡等奏要今後遇有災傷凡百長策任其施為不許再擬納財充吏永杜貪利之門一節實端本澄源之論深為有理方今皇上嗣位之初萬化維新凡此弊政正當除革合無准其所言通將前項陝西山西宣府江西奏行納糧納草等項事例限本年四月以裏通

行停止仍行戶部并各處巡撫巡按鎮守等官先時預  
慮多方儲蓄務使緩急有備不致臨期告乏今後遇有  
災傷及邊方糧草不足不許再行奏開前項生員吏典  
人等納草等項事例貽患將來其在外補充吏典仍行  
天下司府等衙門各遵舊制於農民內選充不許一槩  
濫收如此則非才不得倖進而選法自通任用可以得  
人而民生自遂實為便益緣係停止納粟等項事例以  
防後患及奉欽依吏部知道事理未敢擅便弘治元年

三月初四日具題當日奉聖旨是欽此

議評事魯永清均官審錄奏狀

文選清吏司案呈奉本部送刑科抄出大理寺右寺右評事魯永清奏云云等因具奏奉聖旨該衙門知道欽此欽遵備抄送司案呈到部竊惟官因事設事繁則官多事簡則官少理固然也在前大理寺左寺分管在內文武衙門有犯官吏及各衛所并北直隸軍旗南直隸軍民罪囚以其事簡故設評事四員審錄右寺分管北



直隸及天下司府州縣衛所官吏軍民罪囚以其事繁故設評事八員審錄今右寺該管天下罪囚例不解審而評事員數仍舊委實過多一向無人言及所以未嘗裁減此右評事魯永清所以言之也及查得南京大理寺左右寺寺正寺副評事員數俱與在京大理寺相同其後南京大理寺因是事簡左寺裁減寺副一員評事一員右寺裁減寺副一員評事五員今在京大理寺所審罪囚視南京大理寺頗多合無將大理寺左寺寺正

寺副評事照舊不動將右寺評事裁減四員如此則官無冗員事宜不誤似為允當但今右寺評事八員俱全若就裁去四員緣兩京與評事相等七品官員缺數少令其住俸聽選於人情又似不堪合無俱暫留在任管事待其陞除事故等項去任四員再不除補似於公誼人情兩不相失緣係裁減官員及奉欽依該衙門知道事理未敢擅便弘治元年三月二十一日具題二十三  
日奉聖旨是欽此

議右給事中王珣陳言時務奏狀

文選清吏司案呈奉本部送准禮部咨戶科右給事中  
王珣奏云云等因具奏奉聖旨該衙門知道欽此欽遵  
抄出移咨送司案呈到部查得見行事例監生取選考  
試舉人監生文理平順者多相應多除府佐知州知縣  
等官職事歲貢應例監生文理平順者少相應多除以  
縣丞主簿等官職事歲貢應例監生視舉人監生數多  
但上選之時不得均勻舉人監生有接連五七十名者

亦有百十人中舉人不下十數名者若前項府佐州縣正官缺多舉人該選者數少未免將歲貢應例監生除以府佐州縣正官若前項缺少舉人該選者數多不免將舉人除授縣丞主簿等官例此而行似未停當及查得成化十五年上選南監監生余紹夔起至路魁止百入中有八十二人俱是舉人若欲一例取選一時豈有許多府佐知州知縣不無亦選縣丞主簿等項職事未免有枉才小用之誚今右給事中王珣要將舉人遴選

另置一簿遇州縣正官府佐貳員缺挨次銓補似為有理但歲貢應例監生內亦有可用之人若將舉人另置一簿不惟立法太拘抑恐起人爭競況前項選簿資次已定相傳年遠遽難更動合無將聽選舉人監生照缺斟酌取用如相應員缺數多則量為揀選多取幾人相應員缺數少則少取幾人餘者存留以待下選所取舉人與同歲貢應例監生一體考試其歲貢應例監生若有文理平順者在優等者亦授以府佐州縣正官舉人

如或文理不通考在中下者亦授縣佐等項職事擬除  
如此庶幾選法公而得器使之宜人心平而無咨嗟之  
聲緣奉欽依該衙門知道事理未敢擅便弘治元年五  
月初十日具題十二日奉聖旨是欽此

調除官員奏狀

文選清吏司案呈照得大理寺缺左少卿一員合行照  
例具缺推舉等因到部臣等看得前項員缺須得法司  
出身練達刑名識見老成之人方可銓補今有南京太

僕寺少卿唐章起復待缺論品級相應銓補但唐章不  
係法司出身體得太僕寺少卿楊謚係御史出身練達  
刑名堪任大理寺少卿若將楊謚改大理寺少卿將唐  
章銓補楊謚太僕寺少卿員缺似為允當緣係調官補  
缺事理臣等未敢擅便定奪伏乞聖裁弘治元年五月  
十三日具題十五日奉聖旨大理寺右少卿李介陞本  
寺左少卿楊謚陞大理寺右少卿唐章改太僕寺管事  
欽此

議給經歷張黻誥命奏狀

驗封清吏司案呈奉本部送吏科抄出南京左軍都督府經歷司已故經歷張黻男張琳奏云云等因具本奏奉聖旨吏部知道欽此欽遵抄出送司案查弘治元年四月十四日該張琳奏要請給故父張黻誥命為因查無事例已經立案訖今又奏前因查得張黻由進士先任直隸鳳陽府宿州知州該巡撫南直隸左副都御史張瓚奏保本官持身端謹辦事公勤乞要量加旌異為



照本官未曾給由到部考覈案候後本官陞任後軍都督府經歷司經歷成化二十年九月內刑部署員外郎事主事林俊為劾奏梁方等拏送錦衣衛問降調雲南姚安軍民府姚州判官張黻進本解救林俊亦蒙拏送錦衣衛問調除雲南師宗州知州後蒙憲宗皇帝特旨復林俊張黻之職張黻改除南京左軍都督府經歷司經歷及行准考功清吏司付查得成化二十二年六月內該南京吏部咨開南京左軍都督府經歷司經歷張

黻三年考稱緣由前來案候間本官病故未曾引奏復職又查得成化十九年十二月內該太醫院已故院使張福興男張琰奏稱有父由醫士歷陞院使不期身故雖三任京職因未考滿應得誥勅俱未請給等因具本奏奉憲宗皇帝聖旨准他應得誥命給與該衙門知道欽此欽遵本部已經欽遵覆奏給與誥命訖案呈到部看得南京左軍都督府經歷司經歷張黻始由進士任知州任內曾經奏保旌異例該給與誥命為因不曾考

滿未得請給後任經歷三年考稱亦該給與誥命為因  
不曾引奏復職亦未請給今伊男張琳奏要比照院使  
張福興沒後給授誥命事例請給本官應得誥命切緣  
張福興係一時特恩難以為例但張黻存日只因救林  
俊得罪林俊之効梁方自分必死張黻亦以死自處解  
救林俊皆可謂直言忠諫不畏死難之臣今林俊已蒙  
聖恩陞用天下稱快張黻未蒙陞用而死情實可憐况  
張黻三年經歷已滿又經考稱當給誥命止因未引復

職未曾得請今張黻已死而其父現在欲乞聖恩憐憫  
合無不為常例特賜本官應得誥命使其父受封於生  
前而張黻亦瞑目於地下庶可旌忠諫之臣而為天下  
勸矣緣奉欽依吏部知道事理臣等未敢擅便定奪伏  
乞聖裁弘治元年五月十七日具題次日奉聖旨張黻  
應得誥命與他欽此

王端毅奏議卷八

欽定四庫全書

王端毅奏議卷九

明 王恕 撰

吏部

議封贈繼母奏狀

驗封清吏司案呈奉本部送准南京吏部咨開南京太僕寺寺丞文林照例請給故父文洪故母陳氏故繼母顧氏現在繼母呂氏勅命等因到部送司照得成化二十三年四月十九日欽奉詔書內一款兩京文武官員

未闕誥勅者七品以上至四品若父母現在先與誥勅封之三品以上俱與應得誥命不為常例欽此續該本部查照天順年間欽奉詔書恩例節比題准各官父在兼贈其母母在兼贈其父共給誥勅一軸以省多費事例具題奉憲宗皇帝聖旨照天順年間例給與欽此欽遵又查得本部現行事例凡子應封父母者繼母亦該受封諸司職掌內不曾開有繼母二人三人俱封贈亦不曾開有繼母止封一人止有應封妻者繼室止封一

人之說今該前因案呈到部看得子之於繼母禮有斬衰三年之服繼母或一人或二人三人遇有大故為之子者皆當依例守制遇有恩典似不可止及一人今寺丞文林請給父母并二繼母勅命揆諸天理民彝似合給與但往時未見有二繼母並受封贈者所以再三躊躇未敢輕易與之奏請若照繼室止封一人例不與之奏請不審今後見在繼母奉養有缺及有所違犯宜何如治罪而其服制宜何如守也今因文林照例請給勅

命若不與之講究陳請定奪非惟有孤恩典且使為繼母者自分彼此而意有厚薄而其子之於繼母雖欲同一孝心而不能盡非所以均仁恩而勸慈孝也合無准寺丞文林封贈父母并二繼母共給勅命一軸以後遇有應請誥勅官員或有二三繼母者亦照此例一體請給庶幾恩典均及而母子之心安矣緣係恩典及係事例可否臣等未敢擅便定奪伏乞聖明裁處弘治元年五月二十三日具題二十五日奉聖旨諸司職掌原無



封繼母之文後來許封一人已是加厚了文林勅命只照現行例與他欽此

議丁憂起復官補任奏狀

考功清吏司案呈奉本部送據直隸揚州府批申開送吳傑年四十九歲係本府江都縣人由進士成化七年九月十九日除南京兵科給事中本年十一月初二日到任成化八年正月二十六日歷俸二箇月零二十五日丁父憂起復間為收放糧斛不法等事成化十一年

二月十一日調除湖廣沔陽州判官本年八月十七日到任成化十四年四月二十一日歷俸三十三箇月零五日轉前給事中三年考滿布政司批委管解秋糧南京戶部交納成化十七年三月二十一日歷俸三十六箇月六年考滿赴部給由成化十八年二月初一日復任扣至成化二十年十二月終歷俸三十六箇月九年考滿本月二十四日丁母憂起復到部備付到司查得判官吳傑初考公差未曾給由次考給由復職俱有三

十六箇月第三考內丁憂去任止少歷六日未滿三十  
六箇月今起復到部例該復除補任六日方滿九年以  
定黜陟案呈到部參看得判官吳傑三考任內因是丁  
憂去任少歷六日未滿九年若照起復官員事例復除  
各州判官補任六日之間人事往返尚未得周幹辦政  
務豈能成功徒自勞擾無益公私合無免本官補任六  
日就作九年考滿照例考覈另行查照選用以後丁憂  
起復官員少歷一月以上未滿九年者復除補任滿日

方許給由未及一月者亦照此例免其補任就與照例  
考覈選用如此非惟官免跋涉之勞抑且民免迎送之  
費實為兩便緣係定奪九年將滿丁憂起復官員事理  
未敢擅便弘治元年六月二十七日具題次日奉聖旨  
是欽此

乞命官署管印信奏狀

臣於本月初三日得患痢疾肚腹疼痛兩腿酸軟神思  
昏倦不思飲食伏望聖恩憐憫容臣暫舍部事專一調

理乞將本部印信簡命侍郎一員署管庶不誤公務便益等因弘治元年七月初六日具題次日奉聖旨准卿調理印照舊掌欽此

議給事中林廷玉陳言翊治奏狀

文選清吏司案呈奉本部送吏科抄出吏科給事中林廷玉題云云等因具題節該奉聖旨這本所言該衙門看了來說欽此欽遵抄出送司案呈到部除明賞罰以振軍旅等六事係戶兵等部掌行外今將本部合行革

宿弊以清吏治等四事逐一議凝各開前件伏乞聖明  
裁處緣係節奉欽依該衙門看了來說事理未敢擅便  
弘治元年七月初六日具題初八日奉聖旨准議欽此  
一查得成化十四年該辦事吏吳鵬奏稱近年以來  
有等無藉之徒遇該兩考役滿指以清卷為由潛住公  
解營謀聽缺農民或考退生員頂補希求賄賂要銀一  
百五十兩名曰頂頭房錢設有貧難無錢者逼迫無奈  
儘將產業變賣或揭借錢財贖數出與頂頭以致遞相

倣效習以為常此等之徒着役之後甚至壞法害民以償私債迨有堪充無礙之人懼法不服出銀者反被捏造過名赴堂執稟官不知情就行黜退若此之類不可枚舉乞行禁約今後吏典役滿即將現行文卷交與同房書典當日起送出司如再托故延住取討頂頭房錢者通將受財并出錢過付之人各論以枉法贓罪永為遵守本部已經議擬題准通行禁約去後今給事中林廷玉又題前因合無准其所言通行內外大小衙門如

遇叅充吏典該管官員務要嚴加禁約隨用新叅吏典  
叅充替役不許舊役吏典夤緣交通索取頂頭錢銀敢  
有不遵仍蹈前非事發與者受者及過付之人俱依律  
究治其該管官員知而故縱一體治罪在內令錦衣衛  
巡捕官校嚴加緝訪在外聽巡按御史糾察如此則宿  
弊革而吏治清矣 一看得給事中林廷玉題稱近來  
納粟監生數多彼既以財出身得官豈不拔本生民被  
其魚肉要預先立為上中下三等於臨選之時吏部出



題嚴加考試以文理通暢者為上文理稍通寫字端楷  
非請客者為中不諳文理寫字麤拙請客者為下上中  
二等量其高下與科貢一體選用下等者填注衙門職  
名令其冠帶閒住行移國子監及天下學校省諭各生  
知會使知及時進學毋致後日追悔一節深為有理合  
准所言除往年納馬納粟揆選已到者照舊選用外其  
近來納粟納銀等項監生合無照依本官所議本部於  
臨選之時嚴加考試分作三等如前所擬選用及冠帶

間佳先行國子監及天下學校省諭各生知會使知名  
加勉勵奮志進學以收後效如此庶幾臨時不悞士子  
而將來官亦得人矣 一看得給事中林廷玉題稱教  
官陞用太拘以致豪傑不就貢途充位生員無所取効  
要將天下教官今後俱於舉人除授六年有功蹟照例  
會試九年考滿若無功蹟依舊銓選但有功蹟者俱量  
陞有司相應職事其歲貢出身之人不必除授教職一  
節除六年有功蹟許令會試九年有功蹟者量除有司

職事俱係現行事例別無定奪查得天下教官五千有餘  
遞年取中副榜舉人雖有千餘其間有例不該就教  
職者十有六七該就教職者不過二三百名豈能完補  
前項教職員缺其言九年無功蹟者依舊銓選有功蹟  
者俱量除有司相應職事切緣祖宗舊制教授舉人五  
名該陞舉人三名四名本等用舉人二名以下降學正  
舉人全無考通經降訓導學正舉人三名該陞舉人二  
名本等用舉人一名降訓導全無舉人考通經降訓導

教諭舉人二名該陞一名本等用舉人全無考通經降  
訓導訓導舉人一名該陞舉人全無考通經降邊遠學  
校訓導其教授以下若考不通經俱降河泊所等官百  
有餘年率用此道若將無功蹟教官依舊銓選不惟有  
礙舊制抑且人心無警且各王府審理紀善伴讀教授  
及國子監博士助教等官各府州衛儒學教授舊例俱  
該九年考滿有功蹟教官陞用若將前項教官俱量除  
有司職事第恐各王府并國子監前項教職員缺無從

銓補況教職中間雖有功蹟而年貌才調未必皆堪任  
有司之職合無今後教官九年考滿仍遵舊制第為陞  
降其該陞之中學行超越者授以知縣其次授以審理  
博士等官歲貢等項監生願就教職者本部及翰林院  
嚴加考試務要精通三場者授以訓導其文理生澁者  
不得濫竽其間如此則教官亦可以得人生員不至於  
無教矣 一查得成化二十一年五月該本部題為缺  
官事當將刑科都給事中盧瑀陞除湖廣長沙府通判

給事中秦昇陞除四川順慶府廣安州同知工科給事中  
中童祝陞除湖廣武昌府興國州同知及查得成化二  
十二年九月為急缺綾紗紙劄事將御史劉俊調除福  
建邵武府光澤縣知縣訖近該本部題內開給事中御  
史調外任該陞一級降外任該對品調任者有相應員  
缺就行除授知縣州判官職事無相應員缺者陞俸一  
級仍令照舊管事其前項兩京給事中御史并文職奉  
特旨調任降級者內果有才識超卓遇有相應員缺陞

續量材舉用已將劉俊陞俸一級仍舊管事候有相應  
員缺量材舉用外為照府通判盧瑀州同知秦昇童祝  
又有原任禮科都給事中成實陞除四川順慶府通判  
兵科給事中蕭顯陞除貴州鎮寧州同知浙江道御史  
汪奎陞除四川夔州府通判俱係先年陞用官員比之  
因事降調者不同以此未及舉用今給事中林廷玉言  
盧瑀童祝秦昇雖係陞遷但當時欲斥逐而難為名故  
假此以陰寓意耳要將各官量為陞用合無准其所言

將各官并成實蕭顯汪奎仍照本部題准事例再行訪察如果才識超卓遇缺量材陸續舉用如此庶幾屈者以伸而下無遺才矣

陳言輔治奏狀

今年閏正月臣以年老奏乞休致奉聖旨卿朝廷老臣未可輕退宜勉副任用事有當言的盡心來說毋再固辭欽此臣有以見陛下不欲臣去者非徒欲富貴臣也蓋欲臣竭耳目之所見聞盡此心以匡輔聖政也近因



痢疾陳乞容臣調理將印命侍郎署管奉聖旨准卿調理印照舊掌欽此臣又有以見陛下眷愛之深信任之專也有君如是何忍負之伏覩祖訓條章內府各監局等衙門內官俱有定員各有職掌洪武永樂年間未嘗額外濫設其太監等官非歷練老成縱有聰明才俊亦不輕授近年以來則不然矣前者陛下將內官論年遞降蓋矯往年濫陞之弊欲復祖宗之舊制誠是也臣於病中風聞近日又陞一起內官其數頗多不知是日前

遞降者不知另是一起也前既以為濫而遞降之今何  
不以為濫而復陞之似乎不可舉措如此其何以示天  
下陛下嗣位之初人心歸向如古之二帝三王本朝太  
祖太宗復見於今日莫不稱頌而愛戴之蓋間陛下在  
青宮時存心正大不喜聲色不貴貨利及登寶位又罷  
貢獻織造屏去一應珍奇玩好之物治近習蠹國亂政  
邪術欺君罔上之罪並逐刺麻番僧法王佛子國師革  
罷傳奉冗員追回濫賞莊田蟒衣等項裁抑奢侈奔競

凡此數事皆壞名器損國體傷民財臣民所不欲而不能革非一日矣陛下一旦而盡革之此天下臣民所以稱頌而愛戴之也夫何未久而又濫陞內官如此若復濫賞莊田蟒衣將見前數事不數年復如舊矣欲天下臣民稱頌而愛戴之如今日恐不可得此天命去就人心離合之幾也可不慎與況今邊患未寧災異迭見此正君臣上下同加修省之時而國政如此其何以服遠人而弭天變伏望陛下自今伊始於出入起居之時發

號施令之際務要惟精惟一允執厥中遠宗堯舜之道  
近守祖宗之法決不可為巧言所惑蹈襲前事上拂天  
意下失人心而為社稷憂臣誠激於中詞不能婉干冒  
天威無任戰慄隕越之至等因具本弘治元年七月十  
二日具奏十四日奉聖旨這起內官隨侍春宮年久因  
遇節日各量陞一級了罷欽此

覆大理寺右寺丞楊澄鑒別大臣奏狀

文選清吏司案呈奉本部送准禮部咨禮科抄出大理

寺右寺丞楊澄奏云云等因具奏奉聖旨這本所言該衙門看了來說欽此欽遵抄出將專委任以禮大臣一事移咨送司案呈到部臣等看得大理寺右寺丞楊澄所言乞要陛下將內閣并在廷文武大臣一一重瞳鑒別果有年力衰憊庸庸保祿不堪任事者以禮罷去其老於閱歷明達世故可備顧問計大事決大疑者亦宜曲加庇覆而優容之少賜宣召而寵異之勿因小嫌而阻其志勿以小過而挫其節一節經傳載之而有成說

歷代行之而致成效非無稽之言弗詢之謀可比也然所以體而行之在人君而非臣下之所敢言也伏乞陛下因楊澄之請將見任大臣再加鑒別可者任之其不可者罷去之既任之將以計大事也則小嫌宜在所畧將以決大疑也則小過宜在所容人言當恤報私讐而排陷之者不可不察衆論可采執偏見而非毀之者不可不辨機密之事賜以手詔激切之情許之面陳必如朱熹所謂任則勿疑疑則不任此聖君賢相所以誠意

交孚兩盡其道而有以共成正大光明之業也書曰任賢勿二去邪勿疑願陛下大書於座右時加省覽緣係陳言修省及節該奉欽依該衙門看了來說事理未敢擅便弘治元年七月二十八日具題三十日奉聖旨是欽此

議郎中陸容陳言杜倖門奏狀

文選清吏司案呈奉本部送准兵部咨該兵部武選清吏司郎中陸容奏云云等因奏奉聖旨該部看了來說

欽此欽遵抄出到部除武官本部覆奏外照得文職係  
隸吏部掌行移咨案呈到部臣等竊惟朝廷庶務各有  
攸司銓選人物乃本部所司凡遇庶官有缺本部於該  
選該陞人員內考選推舉量其才器擬奏除授尚未盡  
得其人若不經由本部止憑一人所保輒便授以職任  
欲其得人而不廢事豈不難哉故用人當如孟子所謂  
左右諸大夫國人皆曰賢見賢焉然後用之斯可矣不  
當似晉文公獨謀於勃鞞而用趙衰得人如衰之賢柳



宗元猶且譏之況不如衰乎今郎中陸容乃欲將伊所言斟酌上請乞著為令以善其後一節不為無見合無准其所言通行內外各衙門知會今後凡遇大小官員缺卽為照例開報從本部銓選或推舉擬奏定奪果有大才大智之士屈在下位許在廷大臣及在外巡撫巡按等官從公指實具奏薦舉從本部訪察其人果如所舉然後奏請量材任用一應人員不許營求內外權要之人奏乞陞職其內外權要之人遇有書辦等項官員

有缺聽本部於資格相應人員內擬奏除授不許坐名  
奏討其書辦等官三年六年考滿務要照例赴部給由  
考覈以憑黜陟不許奏乞量陞職事違者並聽本部叅  
奏就將所舉之人拏送法司問罪不分原有官無官俱  
發回原籍為民當差舉主一體治罪若本部容情不叅  
致有違枉亦聽言官糾劾如此則人知警懼而奔競自  
息官得其人而政事修舉矣緣係杜倖門以端聖本及  
奉欽依該部看了來說事理未敢擅便弘治元年七月

二十八日具題三十日奉聖旨是今後一應人員不許營求內外權要冒濫陞職違了的治罪不饒欽此

論推堪任刑部侍郎官員宜簡用奏狀

該本部題刑部缺左侍郎一員例該具缺推舉相應官兩員請旨簡命等因具題奉聖旨是推相應的來看欽此欽遵照例推舉得巡撫甘肅等處地方都察院右副都御史羅明廣東布政司左布政使熊懷俱堪陞任伏乞聖明簡命一員等因具題奉聖旨另推相應的兩員

來看欽此欽遵除另推相應兩員另行具題外臣等仰見陛下進用大臣不偏聽獨任必欲合衆論之公然後用之即書所謂其難其慎惟和惟一也第臣等職司銓衡但凡推舉官員無不盡心豈敢舉非其人以辱顯命若羅明熊懷者臣等再三詢訪咸謂二人學行才識體貌皆可俱係法司出身俱堪前職而羅明尤有風力是以寫羅明在前而熊懷次之今皆不蒙簡用竊恐為陛下言之者誤也臣等欲再推兩員連羅明熊懷通寫進

呈伏望陛下再加訪察裁擇而用之幸甚等因弘治元年九月十五日具題次日奉聖旨羅明甘肅緊要用人且不動熊懷待巡撫有缺酌量推他欽此

論用人勿拘出身衙門奏狀

臣等俱以庸材謬膺銓衡之任雖無知人之明未嘗不盡心為之至於推舉在京堂上并巡撫官及在外方面尤加意焉故每遇有缺必於內外諸司庶僚之中訪察其才行年貌考其科第先後入仕久近再三斟酌然後

具名上請豈敢蔽其賢能引用非人以誤國事上負聖明之託下取不職之譏乎且如有一好缺望之者何止數十人止用一人足矣其餘不用者未免怨謗不曰吏部不知人必曰吏部有私意求其安於義命不怨不謗者蓋亦鮮矣正統年間王竑以戶科給事中陞僉都御史張固以吏科都給事中陞大理寺少卿姚夔亦以吏科給事中陞南京刑部侍郎當是時未聞有言張固等不諳刑名不可為法司官者亦未聞有言吏部用人不

當者其後亦有法司屬官陞為法司堂上不克稱而見黜者不止一人所以然者無他在乎為人賢不肖不在乎出身之地也近日臣等推舉強珍侶鍾堪任大理寺少卿陳壽洪鍾堪任大理寺寺丞自謂此四人才望年資俱各相應用之必合公論已而聖明簡用強珍為少卿陳壽為寺丞人多謂用得其人不意又有論列二人之過失併言臣等舉用之不當者且強珍自作知縣至為御史操持端謹氣節磊落剛直敢言不畏強禦人所

罕及陳壽觀政法司練達刑名及為給事中謹飭無過  
遇事敢言人多稱之斯二人者誠宜居此要職臣等舉  
之未為不當而言之者不無過情幸賴陛下燭理明白  
不為所惑卒從臣等所舉用此二人但以不諳刑名改  
陳壽之官而已不然則強珍陳壽遂為不才之士必見  
棄於聖明之世矣伏望陛下自今伊始聽言之際更加  
審察裁自宸衷庶使臣等日後得以展布四體盡此心  
力為國薦賢不至畏首畏尾斯為大幸有此情惓不能



自己塵瀆聖聰罪該萬死弘治元年九月十八日具題  
次日奉聖旨知道了欽此

議魯府鎮國將軍陳言便民奏狀

考功清吏司案呈奉本部送准禮部咨該魯府鎮國將  
軍陽鑒奏云云等因具本奏奉聖旨該衙門看了來說  
欽此欽遵除開言路以廣見聞等三事本部另行外其  
餘嚴黜陟以安民庶等事係隸別衙門掌行抄單移咨  
到部送司案呈今將所言事件各開前件逐一議擬伏

乞聖裁緣奏欽依該衙門看了來說事理未敢擅便弘治元年九月二十七日具題次日奉聖旨王府輔導官不為常例著巡撫巡按官會同考察奏來處置其餘准擬欽此 一查得本部欽奉詔書并節次奏准考察官員事理俱行移巡撫巡按并布按二司等官將所屬守令等項官員嚴加訪察務在至公無私不許顛倒是非及遇所屬三年六年九年考滿之時務要從公嚴加考覈不許徇情虛應故事以致黜陟不公等因去後今鎮

國將軍陽鑒所言巡撫巡按官考察官員不過據該司  
開陳賢否以憑黜陟該司官與府州縣官豈無親故讐  
嫌以致考察不公黜陟不明要行各處巡撫巡按及布  
按二司官凡遇考績黜陟之時務要設法體訪陟其明  
而黜其幽一節其言有理深中時弊合無准其所言通  
行各處巡撫巡按并布按二司官今後凡遇所屬府州  
縣官或三年六年九年考覈或朝覲考察或保舉糾劾  
務要各秉公心設法體訪得其賢否之實一黜一陟必

須允合輿論不許容情挾私以致是非顛倒黜陟不公  
人心不服責有攸歸 一查得近該吏科給事中林廷  
玉題稱近來納粟監生數多彼既以財出身得官豈不  
拔本生民被其魚肉要預先立為上中下三等於臨選  
之時吏部出題嚴加考試以文理通暢者為上文理稍  
通寫字端楷非請客者為中不諳文理寫字麤拙請客  
者為下上中二等量其高下與科貢一體選用下等者  
填注衙門職名令其冠帶閒住行移國子監及天下學

校省諭各生知會使知及時勉學毋致後日追悔本部  
看得所言有理合無依擬於臨選之時嚴加考試分為  
三等如前所擬選用及冠帶閒住及先行各生知會使  
知各加勉勵奮志進學以收後效題奉聖旨准議欽此  
除欽遵通行外今鎮國將軍陽鑒又以為言緣有前項  
題准事例見行未久若再更張非惟政體不一抑且人  
情不堪 一看得鎮國將軍陽鑒言各王府輔導官不  
得其人要行巡撫巡按官不為常例通行考察年力精

壯文理優長素行清白者存留老弱無為阿諛不才者就便罷黜一節固為有理查得諸司職掌內開各王府官不係常選任滿黜陟取自上裁似難行令巡撫巡按官考察及查得先該藩王奏稱各王府官中間有年踰七十不肯告老致仕及年未七十或沾疾病等項願告致仕者俱照例加陞品級等因該本部議擬奏准已經通行去後其言要乞行選端謹有為之人以充厥職所言有理合無候各王府長史等官有缺本部照例於教

官之中詢訪推舉相應堪任之人照缺銓補庶使輔導得人宗支弼正矣

論奪情起復不可為例奏狀

稽勲清吏司案呈奉本部送內府抄出內官監太監黃順等題云云等因具題奉聖旨准他吏部知道欽此欽遵抄出到部送司案查潘俊等聞父母喪已經移文本部關給勘合守制去後今奉前因案呈到部查得諸司職掌內凡內外官吏人等例合丁憂者仍以聞喪月日

為始不計閏二十七箇月服滿起復此祖宗萬世不刊之令典所以教人以孝而為忠君之本也又查得天順元年四月內該刑科都給事中喬毅等題內一件敦忠孝以正綱常乞勅內外諸司今後敢有奪情起復者彼此治以重罪節奉英宗皇帝聖旨敦忠孝准言欽此欽遵又查得成化三年七月內該戶科給事中劉昊題內一件罷奪情極言奪情非令典等因本部覆奏今後大小衙門如有保留奪情者各治以重罪奉憲宗皇帝聖



旨是欽此欽遵此又列聖之明禁以示聞親之喪者決不可以不守制而保留奪情者決不可以不治罪也今該監官題稱潘俊等俱係通曉匠藝人員即今成造崇奉夫人等處墳塋工程浩大乞要奪情起復且造夫人墳塋工程未為浩大而該監通曉匠藝人員恐不止此二人顯是潘俊等貪戀祿賞忍心忘孝所以營求該監曲為保留且古者國有金革之事不得已而用居喪之人而猶使之以墨衰行事未聞以工藝之小事而奪人

之喪者也仰惟皇上以孝治天下天下臣民方且觀感而興起於孝豈可因此小官而開奪情起復之門以干祖宗之典憲而傷國家之風化乎伏望聖明收回前命仍令潘俊等守制滿日依例起復如此則祖宗之法不壞而陛下仁孝之道通於神明光於四海休徵畢至而令名無窮焉緣係扶持風化及奉欽依准他吏部知道事理弘治元年十月初六日本部具題次日奉聖旨匠官係手藝人已准他了罷欽此臣等竊惟子生三年然

後免於父母之懷故父母沒而子服三年之喪所以報本也此古昔聖人緣情制禮之意萬世行之而不可易者又聞古之人居親之喪有三年不言者有泣血三年者非矯情也蓋不忘親耳洪惟我太祖高皇帝斟酌古禮定為時制凡文職官吏監生生員知印承差人等聞父母喪者悉令丁憂守制所以教之以孝也而守制止於二十七月所以示之以有終也今潘俊等雖是手藝之人已居官食祿亦係應守制人員陛下因該監官之

請而許其奪情起復臣等所以言之者蓋恐有違前項事例使忠臣孝子聞而議之心誠不安今陛下特降德音如此臣等固不敢違若不再陳但恐後之人遂以為例相率而忘其孝有傷聖明之風化是臣等不言之罪也欲望陛下著為定例自今以後凡文職官吏人等聞父母之喪非身任金革之事悉令依例守制終喪敢有營求奏保奪情起復者許科道官糾劾本人以匿喪論奏保之人以違制論如此則人知所警懼而相勸勉於

孝矣何患風俗之不厚天下之不治乎緣係扶持風化  
事理未敢擅便弘治元年十月初九日具題次日奉聖  
旨是欽此

扶持治道奏狀

文選清吏司案呈抄出南京兵科等衙門署科事南京  
刑科給事中等官周紘等奏云云等因奏奉聖旨周紘  
張昂擅作威福刁蹬擾人及著回話又不輸情本當治  
罪且饒他對品調外任劉時還查他差委月日來看該

部知道欽此欽遵抄出送司案呈到部臣等看得差科道官於各教場出其不意抽隊點閱操軍不到者追究下落後占五名以下者降一級五名以上者降二級係是兵部奏准事例其給事中周紘御史張昺既承差委不得不依命前去點閱既點閱不得不依命追究下落況玄真觀離大教場不遠黃藤庫去小教場尤近各官在各教場點畢令管隊官甲各一人散操時係大教場者於玄真觀係小教場者於黃藤庫各以近就近查對

手本水牌揆之事體似不為過若各官慮有今日之患  
不行抽點追究虛應故事則是不遵朝命而為身謀是  
乃作奸犯科者之幸豈朝廷命官之意豈入臣事君之  
道哉且天下之事公私不並立未有執法而不失人情  
者亦未有徇私而不廢公道者執法而失人情者當賞  
徇私而廢公道者當罰此使人之良法為治之要道不  
然而欲紀綱立天下治豈不難哉今乃不治失伍者之  
罪反謫點操者之官此二人固不足惜但恐以後將命

按事者以此為戒不肯盡心盡力為之奸弊如何可革  
除國家如何得治安伏望聖明以事體為念以政治為  
慮復周紘等之官庶使日後執法者得以盡職徇私者  
無所容奸何患國家之不治天下之不安乎臣等愚見  
若是不知聖明以為何如緣係扶持治道及節奉欽依  
該部知道事理未敢擅便弘治元年十月二十七日具  
題次日奉聖旨周紘張弼點軍不到如何不即奏聞却  
展轉刁蹬挾制人及著回話又不輸服已從寬調外任



罷欽此

王端毅奏議卷九

欽定四庫全書

王端毅奏議卷十

明 王恕 撰

吏部

乞休致奏狀

臣以迂腐無用之材仰荷列聖莫大之恩官至太子少保南京兵部尚書叅贊機務久叨厚祿愧無分寸裨補向以年老歸田待盡衡門之下無復他望伏蒙皇上遣使齎勅召臣前來改吏部尚書加太子太保俾典銓衡

恩禮極隆委任已重臣雖無似豈不知感自分年耄德衰不稱任使已嘗累章具奏辭免俱蒙溫詔勉令就職雖極力黽勉其於職業終不能修舉一二又嘗屢乞休致俱不蒙俞允逮今苟延又將周歲筋力愈加衰憊神思愈加昏倦腰膝酸麻步履艱辛又多健忘作事顛倒委的難居銓選之地且其性愚驕不能弼亮調燮良孤皇上以禮召用之意況今滿朝文武臣僚再無一員年及七十者獨臣七十有三形骸潦倒尚玷班行左瞻右

顧豈不知愧又於本月二十二日忽患痰嗽胸膈疼痛  
不思飲食伏望聖恩憐臣衰老賜臣歸田庶幾全始終  
之義完廉恥之節惟聖明垂察幸甚下情無任戰慄之  
至弘治元年十一月二十四日具奏次日奉聖旨卿受  
重託當勉圖報稱毋以疾求退不准休致欽此

再乞休致奏狀

臣自受命之後自知年老力衰才不勝任是以於閏正  
月二次具奏懇乞休致一奉聖旨卿職典銓衡方隆委

任母爲過慮遽欲退休所辭不允欽此一奉聖旨卿朝廷老臣未可輕退宜勉副任用事有當言的盡心來說母再固辭欽此臣感激皇上知遇之恩於職分內事已嘗盡心爲之遇有當言之事亦嘗言之但爲之不力不能輔成聖政言之不切不能感悟聖心者有之非不欲報也六月又以哀老求去復蒙溫詔勉留至今又將半年筋力愈覺衰憊疾病日益侵尋委的支持不去欲望聖恩容臣休致又奉聖旨卿受重託當勉圖報稱母以

疾求退不准休致欽此臣仰惟恩旨固知陛下不舍臣  
臣受恩深厚亦豈欲舍陛下哉但臣老已至矣雖欲勉  
強輔佐聖明少圖報稱委的不能勉強留之實無益也  
伏望聖恩憐憫容臣送骸骨於故鄉遂丘首之至願幸  
莫大焉如此非惟臣感聖恩於沒齒雖九泉之下亦不  
能忘也臣下情無任於邑亦惟少垂察焉弘治元年十  
一月二十七日具奏二十九日奉聖旨前日卿乞休致  
已不准了不必固辭該部知道欽此

議太常寺缺官供祀奏狀

文選清吏司案呈奉本部送吏科抄出太常寺掌寺事  
太子少保禮部尚書劉峩等題云云等因具題奉聖旨  
該部看了來說欽此欽遵抄出送司查得徐啟端原任  
司樂傳陞協律郎王福廣等十三員俱由樂舞生傳陞  
協律郎等項官職成化二十三年九月該科道官陳言  
要將傳奉濫設官員通行查出罷歸原籍閑住等因節  
該奉聖旨是原有官陞職的三品四品降正從六品五



品六品降正從八品七品以下降雜職樂舞生道士出身的冠帶閑住都不許再求進用欽此欽遵外今該前因案呈到部看得太常寺掌寺事太子少保禮部尚書劉岌等題稱本寺缺官供祀要將徐啟端仍復司樂其餘王福廣等月支食米聽候差委祭祀一節先因內外奔競無恥之徒夤緣梁芳等傳陞京職日積月累遂至千數百員費耗錢糧濫占皂隸不可勝紀互相交結以邪妨正又不可言三五年來名器大壞物議不平仰惟

陛下嗣位之初首罷傳陞官員朝野爲之改觀人心無  
不痛快迄今一年有餘事體方定奔競稍息今劉岌等  
却要將徐啟端等復職食糧是爲傳陞官員立赤幟也  
若復用一人則數千百人皆相率而來豈勝煩擾豈不  
壞朝廷清明之政失萬邦黎獻之心所言難准且三年  
一次致祭嶽鎮海瀆歷代帝王俱遣樂舞生行禮若謂  
金山等處墳所四十五處祭祀官少不敷差遣照例差  
樂舞生行禮亦無不可何必開已閉之倖門引既退之

小人然而此舉非真爲缺官供祀蓋是徐啟端等央浼  
劉爰等假此爲名以求復進非惟啟此弊端抑且故違  
詔旨所據徐啟端等俱合拏送法司明正其罪以爲傳  
陞降革再求進用者之戒劉爰等亦合有罪緣劉爰等  
俱係在京堂上及京官及奉欽依該部看了來說事理  
未敢擅便弘治元年十二月十七日具題次日奉聖旨  
是徐啟端等本當拏問且都饒這遭劉爰等罷欽此  
議封見在繼母奏狀



驗封清吏司案呈奉本部送准戶部咨廣東清吏司案  
呈奉本部判送據山西清吏司主事唐錦舟呈云云等  
因到部送司案呈看得主事唐錦舟係正六品官例該  
封贈父母及妻查得伊故父唐仁先任吏科左給事中  
已關敕命故母周氏故繼母周氏俱已封贈孺人訖今  
本官乞要封見在繼母舒氏若拘常例止封一繼母緣  
前繼母係伊父請給勅命所封非本官請給勅命之所  
封今要封其見在繼母亦是止封一繼母非封二繼母

也若不准令封其見在繼母止令封其妻使其繼母穿著常服坐於其上其妻珠冠霞帔立於其傍爲之子者寧能自安爲之婦者亦何忍爲似非聖朝教人以孝之意也合無准令主事唐錦舟封其見在繼母舒氏今後該封繼母者止封見在繼母一人若前繼母曾因父受封後繼母見在亦照此例封之如此則姑婦同榮母子皆安恩澤均而彝倫厚聖朝以孝教人之意可謂曲盡其情而爲萬世法矣緣係請給勅命及係事例未敢擅

便定奪弘治元年十二月二十一日具題次日奉聖旨  
是唐錦舟准封見在繼母欽此

議陞臨清縣為州奏狀

文選清吏司案呈奉本部送吏科抄出巡撫山東地方  
都察院右僉都御史錢鉞等題云云等因具題奉聖旨  
該部知道欽此欽遵通抄送司案呈看得巡撫山東右  
僉都御史錢鉞并巡按山東監察御史向翀各題稱會  
議得臨清縣係南北要衝與臨清衛軍民相叅詞訟繁

多要照湖廣等處茶陵等縣陞州事例將臨清縣改陞  
全設州治銓官鑄印仍隸東昌府管轄將附近館陶丘  
縣來屬一節查有前項事例合無准其所擬照例將臨  
清縣改陞臨清州仍隸東昌府管轄館陶丘縣隸臨清  
州管轄其附改官制更動一應衙門與凡選官鑄印等  
項事務候命下之日另行奏請定奪等因具題奉聖旨  
是欽此欽遵查得諸司職掌內開各州不及三十里長  
有所屬縣分者裁減同知無所屬縣分裁減同知判官

今臨清縣見有三十四里例該全設欲將臨清州附改  
官制除授知州同知判官吏目各一員管馬管河判官  
各一員并儒學添設訓導一員候有相應人員銓補臨  
清縣原除知縣等官俱暫令在彼管事本部查有相應  
員缺陸續具奏調補其本縣儒學倉閘陰陽醫學僧道  
會司等衙門官銜俱未入流本部欲照先年茶陵等縣  
改陞茶陵等州事例將臨清縣儒學見任教諭王楷改  
爲臨清州儒學學正訓導陳曄馬善改爲本學訓導并



陰陽醫學僧道會司俱改爲典術典科僧正道正及原屬廣積常盈二倉新開上閘渡口驛清源水馬驛清泉水驛仍隸本州管轄其各衙門官衙吏典印記俱照州治行移鑄換添設舊印照例收銷其原設守備等官應否裁革行移兵部徑自查議定奪緣係改陞州治衙門官衙事理未敢擅便開坐弘治二年二月初十日具題次日奉聖旨是欽此

議徽王乞陞鈞州為府奏狀

文選清吏司案呈奉本部送准戶部咨河南清吏司案  
呈准工部營繕清吏司手本奉本部送內府抄出徽王  
稱名奏云云等因奏奉聖旨該衙門看了來說欽此欽  
遵抄出送司照得改作衙門係隸別部掌行除稟堂外  
合用手本前去戶部該司呈堂施行等因到司案呈看  
得前項改陞衙門一節比與臨清縣陞州事體相同係  
隸別部掌管本部難以施行合就移咨徑自施行等因  
到部送司案呈看得徽王所奏除脩築城池及改挑河

道俱係工部掌管除行該部徑自施行外其稱分封寥  
落州治要將鈞州改陞爲府治就於郭內添設一縣并  
前項有名州縣一體所轄一節臣等體得肅府見在陝  
西蘭州藩府見在山西潞州荊府見在湖廣蘄州岷府  
見在湖廣武岡州立國多者八九十年少亦不下四五  
十年率皆仍舊未嘗改爲今徽府要將鈞州改爲府治  
又要將汝州郊縣魯山寶豐商城許州襄城長葛臨潁  
鄆城鈞州密縣新鄭等一十二州縣改隸所轄不惟異

乎前四府仍舊之撰且啟前四府改爲之端況今各處  
災荒軍民凋弊欲興此役實非所宜兼且州之與府於  
王頗無所與改與不改於王似無重輕以此言之不如  
仍舊貫之爲善也臣等愚見如此未知是否緣係欽依  
該部看了來說事理未敢擅便伏乞聖裁弘治二年三  
月十四日具題次日奉聖旨是不必改陞還寫書與王  
知道欽此

會議脩運糧儲行移奏狀

文選清吏司案呈奉本部送准禮部咨該本部等衙門  
題刑科抄出都察院左副都御史邊鏞等題湖廣道呈  
刑科抄出總督漕運兼巡撫鳳陽等處都察院左副都  
御史秦紘奏據湖廣等處承宣布政使司呈蒙巡按湖  
廣監察御史姜洪批允軍糧米本院節行會奏去訖布  
政司星馳差人咨稟淮安總督漕運官尚早處置毋得  
臨期致誤國用備由轉呈臣處照詳處置施行備呈得  
此臣查得淮安徐州臨清德州四處水次倉糧數少雖

各該衛所運糧官軍行糧尚不勾用又況臣撫屬地方亦有災傷但於內酌量輕重那移贍補今亦未完其湖廣布政司前項兌軍糧米無從措置除行本布政司計處外爲照各處巡撫都御史與巡按御史行事雖不相關而名分終難紊越每見各處巡按御史與巡撫都御史移文有令按屬衙門抄案轉達此於名分雖乖猶以敵體相待今看得御史姜洪前項批詞玩其語意乃是以上司督臨屬官名分倒置如此顯是姜洪不諳大體

如蒙乞勅都察院將御史姜洪挈問明正其罪以爲越  
禮犯分之戒及行令各處巡按御史今後凡與巡撫都  
御史有行仍照行移體式徑自具呈不許出案轉達庶  
使名分正而體統嚴等因具本該通政使司官奏奉聖  
旨都察院知道欽此欽遵又該刑科叅看得監察御史  
姜洪批詞既曰星馳差人又曰咨稟其下文母得致誤  
等語乃爲布政司而設今都御史秦紘以此自認怒目  
不明輒便叅奏自傷大體事屬紛擾宜從抄出施行通

抄具呈到院看得總督漕運兼巡撫鳳陽等處左副都御史秦紘奏巡按湖廣監察御史姜洪前項批詞玩其語意乃是以上司督臨屬官名分倒置如此顯是姜洪不諳大體乞要拏問明正其罪又稱各處巡按御史今後凡與巡撫都御史有行仍照行移體式徑自具呈不許出案轉達一節已該刑科叅看得監察御史姜洪批詞既曰星馳差人又曰咨稟其下文毋得致誤等語乃爲布政司而設今都御史秦紘以此自認怒目不明



輒便叅奏自傷大體事屬紛擾詳此叅辭御史姜洪似  
爲無罪難以提問及查得行移體式內止開各道御史  
并巡按御史呈都察院並無巡按御史具呈巡撫都御  
史辭語其巡按御史出案轉達巡撫都御史揆諸事體  
亦無妨碍今要徑自具呈行移體式既不該載亦難擅  
擬爲例所據都御史秦紘該刑科叅出前項紛擾情節  
合當查究但本官近陞右都御史巡撫兩廣去訖伏乞  
聖明裁處緣秦紘係在京堂上官及奉欽依都察院知

道事理未敢擅便弘治二年三月十二日具題奉聖旨  
這本係干名分大體禮部便會各部通政司大理寺堂  
上官從公看了來說欽此欽遵抄出到部會同吏部等  
衙門太子太保尚書等官王恕等查看得行移體式各  
道并巡按御史具呈都察院雖無巡按御史呈巡撫都  
御史之文緣巡撫都御史亦係本院堂上官相應具呈  
但在外巡按御史有具呈者有抄案轉行者今巡按湖  
廣監察御史姜洪却批詞布政司星馳差人咨稟淮安

總督漕運官尚早處置毋得臨期致誤國用委的詞語  
欠遜有失大體及刑科并都察院叅稱都御史秦紘自  
傷大體合當查究等詞不無偏向俱各有罪所據御史  
姜洪刑科經該官都察院僉書官吏通該查究提問合  
無今後巡按御史事與巡撫都御史相關者仍照行移  
體式一體具呈庶幾名分攸存體統不紊緣事內干礙  
在京堂上官并京官及節該奉欽依禮部便會官從公  
看了來說事理未敢擅便本月十九日具題次日奉聖

旨是姜洪批詞不遜有失大體難居風憲對品調外任  
刑科都察院經該僉書官吏偏向不公本當提問且饒  
這遭各罰俸糧一箇月欽此欽遵擬合通行除外合就  
移咨欽遵施行等因送司案呈到部看得御史姜洪係  
正七品今對品調外任該除在外正七品知縣職事查  
得山西平陽府解州夏縣見缺知縣一員欲將姜洪調  
補前缺順賚文憑令其就彼到任管事未敢擅便弘治  
二年三月二十四日具題次日奉聖旨是欽此

論知州劉槩有犯比依妖言律過重奏狀

竊見刑部河南清吏司問得犯人劉槩合比依造妖言者律斬秋後處決湯鵬依風憲官受財加其餘官受財不枉法有祿人一百二十貫二等罪止律減等杖一百徒三年吉人依奏事詐不以實者律減等杖九十徒二年半李文祥鄒智俱依不應得爲而爲之事理重者律減等杖七十俱職官各照例運磚各完日湯鵬係有賊官草職爲民吉人李文祥鄒智俱浮躁淺露人數送吏

部收查定奪東思誠曹璘俱供明各還職大理寺審擬  
合律奏奉聖旨是這廝每既情犯深重劉槩捏造非言  
依律處決湯爾風憲犯賊押發陝西肅州衛充軍吉人  
肆姦欺罔發回原籍爲民李文祥鄒智私交妄議降三  
級調邊任都免運磚其餘准擬欽此欽遵抄招用手本  
連李文祥等送本部施行等因除湯爾李文祥等罪不  
至死臣不敢妄議外但劉槩比依前律坐以斬罪臣則  
不能無疑焉伏覩大明律云凡造讖緯妖書妖言及傳

用惑衆者皆斬欽此先儒謂識緯如亡秦者胡之識及  
赤伏符等及諸經之緯書蓋識緯之書即妖書識緯之  
言即妖言以其說未來之興亡能惑衆亂民壞國家之  
事故禁之嚴使之不敢犯也今劉綰招稱不合要得阿  
諛湯臠又捏寫一夢書內稱別後時時夢中會見一夕  
夢一老人騎牛背上行陷於泥淖中公左手把一五色  
石子右手捉牛角引就正路其人謝而去因思人騎牛  
背儼然一朱字正我朝之姓氏豈非天生豪傑欲賴之

引君當道耶但五色石子意不可曉或者公自臺中首先抗疏爲彈之第一等耶請試思之如何等情臣切詳劉綰書詞固爲狂妄不能無罪其夢有無亦未可知推原其情不過因見湯儻節次建言指陳得失不計利害以爲乃天生豪傑以道事陛下也是乃與人爲善之意別無惑衆亂民之情今比依造妖言者律論以死罪臣竊以爲過之設有造如亡秦者胡也之類之言惑衆亂民者不知更以何罪加之昔之時有以忠諫者爲誹謗



深計者爲妖言至今人猶爲之痛惜陛下受天明命正位宸極以堯舜之道治天下天下愛戴之如堯舜矣今法司以如此之情坐劉槃以妖言死罪不無有累陛下清明之政欲使天下後世不爲之痛惜恐不可得也且一婦含冤三年不雨今各處災異人情洶洶此正朝廷欽恤刑獄求言脩省以回天意以弭災變以安人心之時若使劉槃緣此死於獄中豈不愈傷天地之和愈召水旱之災而臣忝在六卿之列知而不言則違先聖事

君有犯無隱之戒其罪將安逃乎是以不避斧鉞爲陛下言之儻蒙聖明裁察寬宥劉槩死罪將見天下後世莫不稱頌皇上欽恤之仁豈不召和致祥衍慶延祚於無窮也弘治二年四月初三日具奏奉聖旨劉槩造言引喻非類法司比律問擬未爲不當你如何這等來說且監著待後發落刑部知道欽此

乞休致奏狀

臣見年七十四歲係陝西西安府耀州三原縣人正統

十三年進士改庶吉士初授大理寺左評事歷陞太子少保南京兵部尚書叅贊機務成化二十二年致仕二十三年荷蒙聖恩遣使齎勅起臣前來俾典銓選特加太子太保以寵異之臣感激知遇之隆是以於職分內事無不盡心爲之其於政治之得失苟有所見亦無不欲言之欲言之者臣爲國之心也間或言之而不能裨補萬一者見之未真知之未至慮之未精而言之未盡中理也是以臣雖欲報覆載之深恩而終不能報也徒

自懷愧莫知所措今臣委的年老力衰日益昏晦兩腿酸痛步履艱辛不能朝叅署事伏望聖恩憐憫容臣致仕歸田以終餘齡庶不有妨賢路而臣之心亦休休矣臣干冒天威無任戰慄隕越之至弘治二年四月初八日具奏次日奉聖旨卿受重任宜勉盡職毋以衰老爲辭不允休致欽此

再乞休致奏狀

臣昨以衰老腿疼步履艱辛不能朝叅署事陳乞休致

奉聖旨卿居重任宜勉盡職毋以衰老爲辭不允休致  
欽此臣有以見陛下不以臣爲迂腐無用特賜溫詔勉  
留是乃上天包含徧覆之仁也豈勝感激臣伏自蚤歲  
從師講學以爲異日儻得成就受一階半級當效古人  
攄忠竭誠盡職報國今臣仰荷聖恩職居冢司官至極  
品此實人臣之奇遇縉紳之至榮豈不欲策勵駑鈍盡  
心奉職以圖萬一之報焉肯因循苟且適已自便託疾  
求去孤莫大之恩負疇昔之志哉但緣臣今年七十有

四委的血氣衰憊腰腿疼痛行走吃力跪拜艱難昨於御前承旨力不能支幾乎跌仆殊失觀瞻此左右之所共見百官之所共見非敢妄言退託况臣資質庸下學術空疎雖有忠君愛國之心而無論道經邦之才久居要地濫叨富貴將恐物議不平非臣之福也伏望聖恩憐憫容臣休致臣雖退伏畝畝亦不敢斯須有忘聖德苟有所見即當上言以盡區區之誠並不敢以進退而貳其心臣干冒宸嚴無任激切屏營之至弘治二年四

月十二日具奏次日奉聖旨卿年雖老宜勉副任用不准休致今後大風并雨雪日免早朝午朝可不必來欽此

乞給假奏狀

臣近於本月初八日因衰老腿疼不能朝參署事奏乞休致奉聖旨卿居重任宜勉盡職毋以衰老爲辭不允休致欽此十二日又以前情懇乞休致奉聖旨卿年雖老宜勉副用不准休致今後大風并雨雪日免早朝午

午朝可不必來欽此臣聞命之餘惶懼殊甚罔知攸措  
自惟樗櫟庸材於時無補誤蒙聖恩再三眷念禮貌益  
隆臣雖捐軀隕首莫報涓埃即欲報名謝恩但緣腿疼  
未瘳步履尚爾艱辛跪拜猶未方便欲望聖恩容臣暫  
且在部勉強供職俟腿疼少愈即當入謝臣狂妄無狀  
罪當萬死弘治二年四月十五日具奏次日奉聖旨准  
他該部知道欽此

定奪欽天監官奔喪奏狀



稽勲清吏司案呈奉本部送據欽天監呈前事據五官  
司歷劉玉呈稱有母張氏弘治二年正月十九日病故  
祖塋在於順天府東直門外遷民屯已於本年三月初  
二日安葬畢思得本職係是親男例應守制理合具呈  
乞爲查照定奪等因到監據此查得洪武十九年二月  
二十四日該本監官於奉天門欽奉太祖高皇帝聖旨  
恁陰陽官人每都不要丁憂永爲常例欽此欽遵外今  
照本監查無守制事例及看得本官母故已行安葬完

畢要行守制一節緣本官係是提督造厯緊要官員正值興工之時及有前項事例本監難擅定奪備呈乞爲查照定奪等因到部送司案呈查得永樂二年正月十七日有本監五官司厯潘緝熙父故要回奔喪該監官奏奉太宗文皇帝聖旨著他去欽此天順二年二月二十九日五官靈臺郎方欽母故呈乞奔喪該監官引奏奉英宗睿皇帝聖旨照例欽此成化元年二月十二日監正谷濱母故奏要奔喪該本部具題奉憲宗純皇帝

聖旨照例欽此成化六年三月二十三日五官靈臺郎  
吳英父故奏乞終喪該本部具題奉憲宗純皇帝聖旨  
准他去奔喪欽此及成化十年三月二十日監副楊瑛  
順天府人繼母病故奏乞躬葬成化十七年三月二十  
五日中官正皇甫敬母故置立塋所順天府地方奏要  
安葬成化二十二年十二月十三日漏刻博士袁紘父  
故置地順天府地方奏乞奔喪安葬本部節次照例題  
准俱限三箇月奔喪安葬畢日照舊辦事前項奔喪事

例已行八十有餘年況素紘父故買地順天府地方安  
葬與劉玉事體相同又係目前之事本官與本監官豈  
得不知今本官既有母喪自合隨即呈監轉呈本部照  
例奔喪爲當却乃遷延月久待其安葬已畢方纔具呈  
意欲免其奔喪顯有貪祿忘親之情而該監官却將奔  
喪事例匿而不言止稱查無守制事例又稱本官係是  
提督造厯緊要官員雖稱呈乞定奪其意亦欲免本官  
住俸奔喪不無受囑情弊且該監官聞父母喪既已免

其守制若又不照例奔喪則是於送終之禮全不用情  
烏得爲孝子乎且聖明之世有祿人員豈可容此不孝  
之人所據劉玉并該監僉書官吏本當究問但呈大內  
有呈乞定奪字樣合無免其送問行令劉玉照例奔喪  
三箇月滿日赴部送回本監照舊辦事以後凡遇該監  
官員人等聞父母喪者務要照依前例隨即具呈奔喪  
敢有託故不行奔喪者以違制論堂上官知而不令奔  
喪者亦治以罪如此則法令嚴而姦頑懼彞倫明而風

俗美緣係查例定奪欽天監官奔喪事理未敢擅便弘治二年四月十七日具題次日奉聖旨是欽此

議何鼎陳言重官爵奏狀

文選清吏司案呈奉本部送內府抄出長隨何鼎題云云案呈查得成化二十一年正月十六日吏部等衙門題爲災異陳言事節該奉憲宗皇帝聖旨傳奉文職大小官員除勲戚功陞廕授不動欽此又查得太常寺奏要將革罷傳奉官徐啟端仍復司樂王福廣等月支食

米本部爲照此舉蓋是徐啟端等夬浼劉爰等假此爲名以求復進欲將徐啟端等挈送法司明正其罪等因具題奉聖旨是徐啟端等本當挈問且都饒這遭劉爰等罷欽此欽遵此其欲開倖門本部題准不容開者矣今何昂題要審查文非考中本等程式陞者自天順元年至今一切革去以杜倖門一節緣天順元年至今三十三年彼時倖進之人壯者今已老老者今已故其見存者亦有遷轉一二次者且如成化年間內閣學士李

賢子李璋彭時子彭頎俱以舍人除授尚寶司司丞李  
璋陞本司卿劉定之子劉倬以生員除授中書舍人陞  
南京尚寶司司丞商輅子商良輔以監生乞恩除授主  
事近來商輅孫商汝謙又以納粟監生乞恩除授尚寶  
司司丞太監張慶姪張暉由承差除授驛丞陞至太常  
寺寺丞今降典簿御史鍾同子鍾鉞由生員除授通政  
司知事之類皆是文非考中本等程式陞除之人有保  
陞爲太醫院官者爲欽天監官者爲工部所屬衙門官



者爲各府都事等官跟隨總兵等官書辦者彼因多係  
廕授及不係傳奉人數不曾查處今若又行查革將不  
勝其革且有不可革者徒見其紛更而無已也臣等竊  
惟治天下之道貴乎簡要安靜處置得宜犯者治之其  
不犯者不必追究如此則事不煩而民志定若今日一  
人言一往事而翻騰之明日一人言一舊事而追究之  
但見其事體叢脞而衆心疑懼非所以顧大體而隆治  
道也又惟諸司官俱有定員不可濫授濫授則民擾士

之進身亦有正道非由正道進者猶鑽穴隙之類也雖有才能何足道哉伏望皇上俯賜裁察合無不必追究往事自今以後內外大小衙門官缺一員則銓補一員不可輕易聽人妄保不由正道出身之人泛濫陞除如此則奔競自息官爵自重朝廷自尊萬姓自安而天下自治矣若往者雖草之來者又許之徒見其紛擾有何益哉緣奉欽依該部查看了來說事理未敢擅便弘治二年七月初五日具題次日奉聖旨是欽此

欽定四庫全書

王端毅奏議

王端毅奏議卷十